



CONVENIO DE COLABORACIÓN ENTRE A CONSELLERÍA DE CULTURA, LINGUA E XUVENTUDE E O CONCELLO DE SALVATERRA DE MIÑO PARA AS ACTUACIÓNS DE RESTAURACIÓN DA PONTE FILLABOA (2ª FASE) EN SALVATERRA DO MIÑO (PONTEVEDRA)

Santiago de Compostela,

REUNIDOS

Dunha parte, don José Carlos López Campos, actuando en representación da Consellería de Cultura, Lingua e Xuventude, en virtude do seu cargo de conselleiro polo Decreto 44/2024, do 14 de abril, polo que se nomean os titulares das consellerías da Xunta de Galicia, no exercicio das facultades que lle concede o artigo 34 da Lei 1/1983, do 22 de febreiro, reguladora da Xunta e da súa Presidencia e o artigo 2 da Resolución do 8 de abril de 1991, pola que se publica o acordo do Consello da Xunta de Galicia do 27 de marzo de 1991.

Doutra, D. Marta Valcárcel Gómez, actuando en representación do concello de Salvaterra de Miño, en virtude da súa condición de alcalde da citada corporación segundo o disposto no artigo 21 da Lei 7/1985, do 2 de abril, reguladora das bases do réxime local e no artigo 24 do Real decreto lexislativo 781/1986, do 18 de abril, texto refundido das disposicións legais vixentes en materia de réxime local.

Todas as partes teñen plena capacidade para levar adiante o presente convenio de cooperación e por tanto,

EXPOÑEN

Primeiro:

Que a Xunta de Galicia asume a xestión das funcións sobre o patrimonio cultural en virtude do Real decreto 2434/1982, do 24 de xullo, sobre traspaso de funcións do Estado á Comunidade Autónoma de Galicia en materia de cultura, de acordo co establecido no artigo 27.18 do Estatuto de Autonomía, en consonancia co estipulado no artigo 148.1.16 da Constitución Española, ámbito desenvolvido na Lei 5/2016, do 4 de maio, do patrimonio cultural de Galicia.





Segundo:

Os apartados 1) e 2) do artigo 198 da Lei 5/1997, do 22 de xullo, de administración local de Galicia establecen que as administracións públicas galegas axustarán as súas relacións aos principios de colaboración, cooperación, auxilio, coordinación e respecto aos correspondentes ámbitos competenciais, garantíndose a máxima eficacia nas xestións administrativas, podendo subscribir convenios de cooperación entre si, segundo o disposto no artigo 198 da mesma lei. Do mesmo xeito, o artigo 3.2 da Lei 5/2016, do 4 de maio, do patrimonio cultural de Galicia, encomenda aos concellos a obriga de protexer, difundir e fomentar o valor cultural dos bens do patrimonio cultural de Galicia que se localicen no seu ámbito territorial.

Terceiro:

O inmovible denominado Ponte Fillaboa, está protexido polo seu valor cultural ao ter a consideración de ben pertencente ao Catálogo do Patrimonio Cultural de Galicia segundo o que determina a disposición adicional segunda da Lei 5/2016, do 4 de maio, do patrimonio cultural de Galicia (DOG núm. 92 do 16.05.2016), ao estar recollido no Catálogo do Plan Básico Autonómico coa clave 2018_52338.

A Ponte de Fillaboa é unha ponte de cantaría de granito construído sobre o río Tea para dar servizo ao antigo camiño que unía Tui e o porto de Baiona, de intensa actividade comercial na época medieval. Ten unha lonxitude de 75 metros, estando composto de catro bóvedas apuntadas, sendo a número tres de gran envergadura chegando aos 16,32 metros de luz para salvar o río.

A data da súa construción é probablemente a Idade Media, xa que existen marcas de canteiros que polas súas características puideran ser dos séculos XIII e XIV, así como o feito da configuración apuntada dos seus arcos. A finais do século XVII se realizan obras de reconstrución do arco número dous e a principio do século XX se acometen obras probablemente de reconstrución do arco número un.

Cuarto:

A erosión provocada polas fortes corrente do río, provocaron nos últimos anos unha serie de patoloxías na cimentación dos apoios dos arcos, especialmente do número dous, sendo evidentes outros problemas como a presenza de gretas nas bóvedas número dous e tres. Todo elo fai necesario a intervención urxente sobre a Ponte para garantir a estabilidade estrutural da mesma.





O dano que presenta o tajamar da pia dereita é unha antiga greta vertical que separa a súa parte frontal do resto do corpo. O pe do tajamar existe un recalce de reforzo que, nos últimos anos, debido á acción da crecida do río, presenta a rotura de varios sillares.

A bóvedas esquerda e central presentan numerosas fisuras e gretas lonxitudinais.

Propóñense as seguintes actuacións ordenadas por orde cronolóxica no marco de colaboración entre a Consellería de Cultura, Lingua e Xuventude e o Concello de Salvaterra do Miño, para a reparación dos danos que presenta o tajamar, o reforzo da cimentación da pila 1 e a mellora da fábrica da bóveda 2:

- 1.- Desbroce e limpeza das marxes aos dous lados da ponte.
- 2.- Desbroce e limpeza dos paramentos da ponte para retirar a vexetación. Apertura e limpeza de xuntas, retacado de ocos e gretas e rexuntado con morteiro de cal hidráulico.
- 3.- Traballos de consolidación das bóvedas esquerda e central mediante inyección de lechada de cal hidráulica e atirantado do tímpanos con bulóns de aceito inoxidable.
- 4.- Reconstrución da fonte do tajamar da pia dereita e recalce da súa base.

Por todo o exposto, as partes acordan subscribir un convenio de colaboración baseado nas seguintes

CLÁUSULAS

Primeira.- Obxecto do Convenio

O obxecto do presente convenio é regular as bases de colaboración entre a Xunta de Galicia, a través da súa Consellería de Cultura, Lingua e Xuventude, e o Concello de Salvaterra de Miño (Pontevedra) para as actuacións de restauración da Ponte Fillaboa (2ª Fase) en Salvaterra De Miño (Pontevedra).

Trátase dun traballo con substantivade propia que se considera o necesario para a finalidade prevista.

De acordo co artigo 26 de la Lei de subvencións de Galicia, para o outorgamento desta subvención non é posible promover a concorrência pública xa que o Concello de Salvaterra de Miño é a única entidade promotora deste proxecto, actuación que se encadra dentro da liña de actividades que contribúen ao enriquecemento do patrimonio





cultural galego. A obra realizarase na ponte sobre o río Tea ao seu paso polo concello de Salvaterra de Miño, polo que é este concello o que posúe a especificidade como beneficiario así como a da actuación subvencionada e o interese social da axuda concedida para a conservación desta ponte medieval.

Esta intervención está incluída no Plan estratéxico para a protección e conservación do patrimonio cultural de Galicia da Dirección Xeral do Patrimonio Cultural, dentro do obxectivo operativo Conservación dos bens do patrimonio cultural emerxentes, do patrimonio etnolóxico e do patrimonio civil", polo que a sinatura deste convenio encádrase dentro dos previstos neste plan.

Segunda.- Obrigas da Consellería de Cultura, Língua e Xuventude

A Consellería de Cultura, Língua e Xuventude da Xunta de Galicia, dentro das liñas de actuación que en materia de protección, conservación e posta en valor do patrimonio cultural, están sinaladas no seu programa de obxectivos, realizará as actuacións oportunas para a execución das obras de restauración da Ponte Fillaboa (2ª Fase) en Salvaterra De Miño (Pontevedra), con cargo aos orzamentos xerais da Comunidade Autónoma de Galicia de 2026 en función das súas dispoñibilidades económicas e en consonancia co disposto nos artigos 1 e 3 do Decreto 246/1992 da Consellería de Economía e Facenda (DOG núm. 159 do 17 de agosto de 1992).

Terceira.- Obrigas do Concello de Salvaterra de Miño, (Pontevedra).

Pola súa banda, o Concello de Salvaterra de Miño en Pontevedra, comprométese a autorizar a plena e libre dispoñibilidade dos terreos e inmobles necesarios a favor da Consellería de Cultura, Língua e Xuventude para que esta poida acometer a execución das actuacións obxecto do presente convenio. Esta libre dispoñibilidade será realizada, segundo o establecido no Decreto 246/1992, do 30 de xullo, da Consellería de Economía e Facenda. Así mesmo, será o responsable de aprobar o documento técnico das actuacións e conservar e xestionar o acceso aos restos no ámbito dos terreos da súa titularidade.

Cuarta.- Comisión Paritaria

Coa finalidade de asegurar o cumprimento do presente convenio, créase unha comisión mixta de seguimento e control, integrada por:

Dirección Xeral de Patrimonio Cultural
Complexo Administrativo San Caetano
Edificio número 3 - 2º
15781 Santiago de Compostela
T. +34 981 544 877
patrimonio.cultura@xunta.gal





1. Dous (2) representantes da Xunta de Galicia
2. Dous (2) representantes do Concello de Salvaterra de Miño, (Pontevedra).

Quinta.- Resolución

O presente convenio resolverase polo incumprimento total ou parcial dalgunha das cláusulas que o regulan.

Sexta.- Vixencia

O presente convenio entrará en vigor o día da súa sinatura e estará vixente ata o 31 de decembro de 2027 e, en todo caso, ata a finalización das obras contempladas nesta intervención.

En todo caso, a duración máxima prevista non poderá ser superior aos catro anos, salvo que normativamente esté previsto un prazo superior, de acordo co artigo 49 apartado h) da Lei 40/2015, do 1 de outubro, de Réxime Xurídico do Sector Público.

Sétima: Publicidade do convenio

As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno Aberto da Xunta de Galicia incluíndo os datos identificativos das persoas asinantes.

Asemade procederase á inscrición do convenio no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

Oitava: Notificación electrónica

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.





As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Novena.- Réxime Xurídico

Este convenio ten natureza administrativa. As cuestións litixiosas xurdidas da aplicación do presente convenio, e non resoltas en vía administrativa, serán resoltas pola xurisdición contencioso-administrativa.

E en proba de conformidade cos termos do presente convenio, as partes comparecentes asínano e rubrícano por duplicado exemplar no lugar e data expresados.

O Conselleiro de Cultura, lingua e
Xuventude,

A Alcaldesa de Salvaterra de
Miño (Pontevedra)

José Carlos López Campos

Marta Valcárcel Gómez

